

陶雲汀先生奏疏

奏疏卷二十六目錄

撫蘇稿

安化陶澍

驗收徒陽運河黃金張官閘座完工摺子

總督會稿

經辦練湖各閘出力知府請加銜摺片

總督會稿

議覆運河兩岸積土緩辦摺子

總督會稿

瓜洲龍風傷損摺片

安徽省志告成奉

旨議敘謝

恩摺子

述職請

觀摺子

酌議沙洲歸公章程摺子

調補首府摺子

總督會稿

委蒞司護篆併遞署司道摺子

賦繁知縣四載全完請獎摺子

總督會稿

籌挑徐州府屬河淤摺子

總督會稿

京旋回任謝

恩摺子

請緩

計典摺片

驗收徒陽運河黃金張官閘座完工摺子

總督會稿

奏爲修建黃金張官兩處閘座驗收完竣仰祈  
聖鑒事竊照鎮江府屬之徒陽運河爲江浙兩省漕  
行要道前經臣等議將練湖上首之黃金閘修  
復以收蓄湖水並將運河范家溝北之黃泥閘  
移建於迤南五里之張官渡以廻濟上游估需  
工料銀二萬四千兩

奏奉

諭旨准於司庫封貯銀內先行如數借給責成該管  
知府一手經理督同丹徒丹陽二縣遴員趕辦所

借銀兩俟新漲沙洲歸公召佃後徵存租息陸續  
歸款免其報銷等因欽此飭據鎮江府趙光祿將  
黃金閘工程交丹徒縣吳浚承辦於三月十五  
日開工移建張官閘工程交丹陽縣朱清耀承  
辦因俟重運糧船過竣始能築壩於四月十五  
日興工該府仍督同大小各委員親駐工次不  
避風雨日夜籌辦併經藩司梁章鉅親往督催  
等復迭札諄飭認真趕辦旋據該府稟報黃  
金閘於五月二十一日工竣張官閘於六月十  
七日告竣等因各有審辦要案不克分身卽

委藩司梁章鉅於催工之便覆實驗收茲據該  
司稟稱查驗黃金閘共長二十七丈高二丈連  
海漫石二十一層黃泥閘共長五十一丈二尺  
高一丈八尺六寸連海漫石二十層核對原估  
高寬丈尺相符如式砌造毫無草率偷減當飭  
將閘牆幫護堅實趕緊清釐河底啟除土壩一  
面先將跌壩塘刨空格外寬深俾資容納於六  
月二十日開壩通水等情前來臣等伏查練湖  
閘座失修水無蓄洩以致數百里運河僅藉江  
潮一線爲之灌注每遇冬春之際重空兩運經

臨湖落水枯動形掣肘茲蒙

恩准借項與修免其報銷俾得樽節綢繆將黃金張  
官二閘擇要先修完竣實屬工堅費省設遇京  
口淺阻改由橫閘行走足收濟運通漕之益惟  
查練湖廢壞已久據該府勘報湖之西面及東  
北一帶間有淤灘稍占蓄水地步上湖溝港逼  
窄山水不能暢達若能浚湖之淤藉以培堤實  
屬一舉兩得現值農事正忙且湖水較長容俟  
秋冬間再行酌辦至於籌蓄放之機宜復巡查  
之舊典侵耕盜決禁令宜嚴涵洞誌椿稽察必

慎以及下游各閘之攔蓄夫役住房之建置均  
應釐定章程俾垂經久除俟妥籌另辦外所有  
閘工完竣驗收啟壩緣由謹合詞恭摺具

奏伏乞

皇上聖鑒謹

奏

道光九年六月二十八日具

奏七月二十八日奉到

硃批立法不難務要實力行之妥爲籌辦欽此

經辦練湖各閘出力知府請加銜摺片

總督會稿

再練湖廢壞已久從前督撫諸臣屢經議及皆

以工鉅費繁經理乏人未能興舉今鎮江府知

府趙光祿自到任以來隨同臣等催漕挑河面

諭機宜均能領會實心經理去冬今春兩次開

放練湖濟運均係該府經辦此次駐工三月之

久風雨不辭獨任勞怨目下閘工雖竣一切善

後事宜及浚淺加堤各務尚須該府一手經理

應懇

天恩將知府趙光祿

賞加道銜俾資策勵所有承辦黃金剛之丹徒縣吳  
淩現已升補高郵州知州併於催漕案內蒙

恩賞加同知銜此次毋庸請敘其承辦張官閘之丹  
陽縣朱清耀應俟冬後挑湖加堤各工辦訖再

行籲請

恩施此外丹徒主簿吳錄巡檢莫如和呂城巡檢沈  
起鯨分委幫辦閘務俱有微勞經臣等飭司存  
記俟再有出力之處酌量辦理合併附陳請

旨

道光九年六月二十八日具

奏七月二十八日奉到

硃批另有旨欽此又同日奉到道光九年七月十四日內閣奉

上諭蔣攸銘等奏請將經辦練湖濟運工竣之知府懇恩策勵等語江蘇鎮江府屬之練湖閘座失修水無蓄洩前經該督等奏准借項修建黃金張官兩處閘座責成該管知府督辦現已驗收完竣該府趙光祿駐工三月之久獨任勞怨尙爲出力着加恩賞加道銜以示鼓勵該部知道欽此

議覆運河兩岸積土緩辦摺子

總督會稿

奏爲遵

旨查議徒陽運河岸旁積土因工鉅費繁籌款維艱  
應請從緩挑辦恭摺覆

奏仰祈

聖鑒事竊臣等承准軍機大臣字寄道光九年四月  
初一日奉

上諭御史朱壬林奏籌濬徒陽運河一摺江蘇徒陽  
運河每歲興挑仍形淺阻殊於漕運經行大有關  
係據該御史奏稱欲通運道先濬河身欲濬河身

先除岸旁積土所奏不爲無見著蔣攸銛陶澍會同悉心籌議如何將岸旁積土設法起除併挑出泥淤不得再於岸旁堆積之處體察情形據實奏明督同承辦各員妥爲經理至該督等前經奏請修復下練湖閘壩以期蓄水恐停蓄稍深於上練湖民田易至浸澇著該督等一體查勘具奏該御史原摺着鈔寄閱看將此諭令知之欽此遵

旨寄信前來當卽恭錄轉行欽遵籌議勘辦去後茲據鎮江府知府趙光祿督同丹徒縣吳浚悉心查勘運河兩岸積土歲久堅實無虞傾卸請俟

經費充裕再行挑除等情稟經蘇州藩司梁章  
鉅常鎮道劉名載覆核轉詳請

奏前來臣等伏查鎮江府屬之徒陽運河本係鑿

山而成水無來源全藉江潮灌注而自丹徒以  
下至常州蘇州勢若建瓴難於存蓄每日渾潮  
兩至水去沙停終年淤積更加猪婆灘野狗墩  
等處活沙濕泥隨浚隨漲當空重經由之際正  
湖枯水落之時年年擇段小挑隔六年大挑一  
次從前挑出淤泥於兩岸隨便堆積百數十年  
曾曾加增遂若崇山峻嶺每遇風雨仍復傾卸

入河嘉慶十五十七等年會議借款挑除因工  
鉅費繁未能興辦後於嘉慶二十一年間臣陶  
澍於巡視南漕任內

奏請起除兩岸積土經前督臣孫玉庭逐段查勘  
因地就勢抽開土巷收買山背民田山地爲挑  
河堆土之所奏奉

諭旨給項興辦在案現查各土巷與原估寬深丈尺  
淺窄間有不符蓋因挑夫貪圖近便每乘工員  
照察未周卽在土巷內隨地拋置亦勢所不免  
臣陶澍前於道光六年冬驗收挑工會將寄土

岸旁之工員鉏信友奏明勒令賠挑近年以來均知儆戒由土巷傾棄山背但新土雖不致增積而舊土究未能起除論經久之計惟有將鎮江兩岸之土移補高郵寶應一帶絳道最爲一舉兩得第查運河自京口至丹徒鎮計二十里河長三千五百餘丈就兩岸併計已有七千餘丈其間積土或與城堦相平或高出民房五六尺及一二丈不等又自丹徒鎮至丹陽縣境大挑年分煞壩之處爲止計程百餘里積土更加數倍若起除淨盡非百餘萬金不可

國家經費有常驟難籌此鉅款且現據該府縣勘  
明兩堤老岸歲久堅實卽遇大雨時行亦不致  
有衝刷之虞應請暫行從緩俟籌有款項再行  
興辦以後每年冬底挑澇運河仍責成該管道  
府嚴督工員認真稽察務令出土至山後官置  
地內堆積不准再在土巷傾棄挑工完竣仍令  
承辦各工員酌畱人夫將拋撒寄土收拾乾淨  
馬路土巷剗削平整驗明方准撒散以免新積  
所有每年承辦挑河各縣自舉工員代辦一節  
行之數年頗有實效如另派委員經理殊多掣

肘亦應仍循其舊毋庸另議更張至下練湖水蓄深恐淹上練湖民田臣等亦早經慮及道光七年冬間臣陶澍併會附奏陳明在案惟查該處湖形南北雖屬相平而上練湖係來源經行之處地勢較高其近水蘆灘本屬無多但須略築堤埝卽資防衛與下練湖堤外民田四萬餘畝之全藉湖水灌溉者情形迥殊斷不能顧少失多任令湖涸且此時修建黃金閘止係復舊竝非增新閘板尺寸卽接地勢高低依時啟放無慮上湖淹浸仍當勸諭各業戶於農隙時浚

陸運清先生類稿卷三十六  
九  
淺修堤俾資久遠所有臣等遵

旨籌議暫緩起除積土及挑河修埂各緣由謹合詞  
恭摺覆

奏伏乞

皇上聖鑒謹

奏

道光九年六月二十八日具

奏七月二十八日奉到

硃批知道了欽此

瓜洲龍風傷損摺片

再臣接據江都縣稟報六月初四日午後瓜洲一帶忽起龍陣暴風雷雨刮倒民房百餘間傷斃男婦數十名經該縣黃冕馳往勘驗捐貲安撫並酌給修房棺木藥餌等費又據報十一日酉刻瓜洲江口因風狂潮湧沖塌江埂接連綿路埽工三十餘丈沖漫埭內民田七十餘畝該處幸無村落並未傷損人口等情臣接報後卽飛飭揚州府督同該縣覆勘將先後猝被暴風各居民妥爲撫恤其水漫之處趕緊車戽補插

陸軍部奏請  
禾苗竝酌築子埕俾資保護合并附片以

聞謹

奏

道光九年六月二十八日具

奏七月二十八日奉到

硃批詳細查看妥爲辦理欽此

安徽省志告成奉

旨議敘謝

恩摺子

奏爲恭謝

天恩事頃准安徽巡撫鄧廷楨咨照到臣道光九年  
六月初六日內閣奉

上諭鄧廷楨奏創修安徽省志告成一摺安徽自分  
省以來未經輯有通志道光五年陶澍奏准予限  
纂輯現據鄧廷楨奏稱業經修輯完竣竝繕寫正  
本呈覽此書由陶澍具奏創修鄧廷楨督辦蒞事

陶澍鄧廷楨均着加恩交部議敘欽此欽惟我

皇上德隆丕冒

治洽同文廓紘振絡之餘莫非

聲教航海梯山之衆悉入輿圖

御書鐫鐵蓋山前西極恢而琳瑯煥色

宸製綴

玉瀾堂上東壁啟而翰墨流輝惟

皇朝大一統之規聿昭版籍知

聖人見天下之蹟不下堂階臣隅見多封咫聞未遠

廿年簪管虛窺宛委之藏十載觀風敢效輶軒

之採藝者備藩院服持節舒州偶流覽於山川  
閒訪尋夫人物畱分楚紀無由讀三墳五典八  
索九邱地控吳都亦徒賦重關複江四會五達  
良由江分上下未有專書遂致世閱春秋難接  
墜簡盛美所在文獻缺如既非體國經野之宜  
尤乏訓俗型方之要文武之政在方策豈日無  
徵

堯舜之世有文章未遑多讓欣叨

聖訓

俯允輯修俾存掌故於蒲編爰訂程期於筴歲適臣

陸雲汀先生奏疏卷二十六  
三  
易地未及成書鉛槧甫操詎足當三篋之補規  
模粗具實僅同一簣之登善歌有待於繼聲條  
理咸資

御律集議羣依乎

折衷始終允賴

宸謨茲者全帙告成正編進

覽總二百七十卷之富綜括靡遺自五年三四月以  
來編摩罔懈地圖地事地俗敦土訓而一省攸  
關史學史識史才罄臣力而三長早愧迺荷

絲綸特沛

甄敎偕頒弗會手繪圖經亦拜賈耽之賜迄未自隨  
書局儼分君實之褒追維屢歲之前

恩超異數計及造端之始

寵竝同人從知一技必庸於討論修飾潤色之初謀  
思適野願祝

萬齡有道以康樂和親安平之俗書上行人所有臣  
感激休幸下忱謹繕摺恭謝

天恩伏乞

皇上聖鑒謹

奏

道光九年七月二十日具

奏八月十九日奉到

硃批知道了欽此

述職請

覲摺子

奏爲遵

旨額請

陛見仰祈

恩准藉達下忱事竊臣前於道光三年正月蒙

恩擢授安徽巡撫五年正月始得入都恭聆

聖訓旋即回皖其年六月接奉

諭旨調任江蘇卽赴新任扣至八年六月已滿三年

適因江南鄉試屆期安徽巡撫鄧廷楨以本籍

迴避欽奉

特旨派臣監臨未敢瀆請曾經附摺陳明俟場後入  
覲奉到

硃批毋庸前來明歲秋間再行奏請欽此在案計臣

自蒙

恩簡任巡撫以來惟在皖時一近

天顏及抵江蘇又閱五載犬馬之戀實深時望

闕廷而佇慕駕純之慚彌積惟資

訓誨以遵循現查秋錄久竣奏銷亦訖地方校謚陽

雨均調別無緊要事件欽遵前奉

殊旨專摺具陳仰懇

聖恩

俯俞所請俾臣稍舒依戀之忱臣前者備員京秩從  
未預班隨扈此次迎謁

行在獲侍

屬車而承

訓示尤深慶幸臣不勝瞻

天翹企之至爲此瀝情顛懇伏乞

皇上聖鑒謹

奏

道光九年七月二十日具

奏八月十九日奉到

硃批計算程途於十一月初間抵京陛見可也欽此

酌議沙洲歸公章程摺子

奏爲新漲沙洲歸公酌議辦理章程仰祈

聖鑒事竊照江蘇省沿江沿海沙地坍塌漲靡常每因爭占釀衅訟鬪紛起最爲惡習欽奉

諭旨查辦經臣體察情形據實覆

奏請將此項新漲沙洲召佃收租撥充公用作爲地方水利津貼接准部覆嗣後遇有接漲突漲沙地卽飭查勘入官隨時定課議租專案咨部如有轉則陞科之處亦令照例隨時勘辦查報統於大丈案內彙題應納課銀歸入奏銷造報

此項租息既經歸公勤用應令每年送一管收  
除在四柱清冊備查至從前報坍各戶既准留  
糧在先如有相連接漲准其撥補仍令查明戶  
口畝數彙造簡明冊送部備核等因行司通飭  
遵照並令將應辦事宜籌議詳辦去後茲據江  
寧藩司賀長齡蘇州藩司梁章鉅會議稱江蘇  
各屬沙洲於未經

奏定新例之前民間具呈投買或已經繳價尙未  
造具冊結咨部或輾轉駁查未經定案或雖經  
投買尙未繳價若仍准其承買則紛紛查辦弊

竇滋多自應查明例前報部有案者准其承買  
執業其餘投買雖在例前而未經報部及例後  
詳報各案無論曾否繳價均應查照新例將沙  
地歸公分案退還價值以清界限而免混淆其  
中有書院善堂等請買沙洲作爲公產雖與民  
間私業不同如例前未經定案卽不便辦理兩  
歧亦應發還原價聽各紳士另行置產并此後  
遇有新漲均不得依托名目濫請撥給以致歸  
公沙地無多不敷津貼動用於地方水利仍無  
實濟至各屬沙地有漕田蘆洲之分漕田銀米

竝納於每年地丁奏銷入額蘆洲僅完課銀於  
蘆課奏銷入額并於五年大丈案內彙

題此次奏定歸公仍入五年大丈係專指蘆洲而  
言漕田在腹地居多本較蘆洲爲少應完糧賦  
亦倍於蘆洲課重利輕爭端卽少原與蘆洲迥  
異仍循舊例辦理不在歸公之列等情詳請具  
奏前來臣覆查無異竝將所議召佃收租陞科造  
冊各事宜逐細籌酌臚列條款敬呈

御覽

一已冊未報之案應令各州縣查明豁糧也查

畱糧待補之例業已停止其例前達部覆准  
畱糧之案新例原准撥補自毋庸議惟各廳  
州縣辦理畱糧間有自行註冊或雖詳報而  
輾轉駁查未經詳咨達部者此時既不便補  
請畱糧自當勘明請豁卽業經咨部畱糧各  
案如所畱之糧節年拖欠不完是徒有畱糧  
之名而無畱糧之實應將賦額豁除免追積  
欠註銷待補之案以杜刁巧至各屬舊有公  
地除河營鹽場各照舊章辦理外其書院善  
堂學租及旗丁濟運武營調劑兵丁并緝捕

經費等項舊有撥買蘆洲歷久藉爲恒產以充公用如坍沒之後一概不准撥補則經費難免有缺應查明前項沙洲原業各有若干頃畝造具清冊咨部存案以此次查辦爲定額嗣後如有額內坍缺准其循照舊例俟原坍界內與現業地畝緊相連接之處漲有新灘按數撥補仍先將坍糧豁除俟撥補之後另行陞科以免賠累其寺院公產向係官爲經理者亦照此辦理其餘一切私業不得援以爲例

一租額應分別定數一律徵收折色也查歸公灘地墾種起科之後卽應徵租若按其所得花息派撥員役臨洲分收不特薪水多一開銷卽收貯亦多折耗且運送變價輾轉過手易於中飽自應概收折色惟地畝腴瘠不同各處情形互異所有應收租息若憑空酌斷無以示平允彼此紛岐又無以昭核實查釐課全書所定課銀輕重卽視地之肥磽以爲等則今酌中定議應請照課銀之數加七起租如上田課銀每畝九分一釐者加銀六錢

三分七釐其應徵租銀七錢二分八釐分作  
八成以一成銀九分一釐完課以六成銀五  
錢四分六釐解司尙餘一成銀九分一釐作  
爲一切公費其餘各照科則重輕分別增減  
由各廳州縣設立三聯版串填明佃戶姓名  
徵租銀數於每年十一月初一日啟徵先期  
飭令洲保催輸令各佃自行交納現銀儘徵  
儘解統限於次年五月底全完如有未完照  
雜項錢糧例核計處分倘有侵蝕卽照虧缺

帑項例嚴行叅辦

一陸科地畝應俟生有蘆草再行起科也查蘆課全書有水影光灘泥灘等項名目均無租息可收嗣後歸公洲地應俟生有蘆草再行陸科起租完課所有應完課銀卽由該地方官於租息內劃款批解至遇災蠲緩遇冊報豁仍與民洲一律辦理

一報部清冊應查照部議於年終造冊開列四柱總數報部毋庸隨時逐案詳咨以歸簡易也查沙洲租息係

奏明爲擇要興修水利津貼以地方自然之利充

地方必需之用實屬以公濟公遇有應辦水利由藩司確勘地方緩急情形詳明督撫酌核動放歲終仍由藩司將一年收支數目彙報督撫備核層層稽察自無弊混至動用工費之際時價間有低昂未能盡一非年例興修可比卽不能悉依例價造報應請每年由兩藩司各開管收除在四柱總數冊詳咨報部其工程細數毋庸再行開造亦毋庸逐案詳咨以免輾轉駁查登覆之繁而省案牘

以上各條經臣逐加酌核均屬切要此外尚有

應行山外查辦事宜亦經飭令藩司議定章程  
通詳立案并飭各州縣實力遵辦以資經久所  
有新漲沙洲歸公酌辦章程謹會同大學士兩  
江總督臣蔣攸銛恭摺會

奏伏乞

皇上聖鑒訓示遵行謹

奏

道光九年八月初三日具

奏九月初七日奉到

硃批依議戶部知道欽此

調補首府摺子 總督會稿

奏爲省會首府要缺遵

旨遴員調補所遺沿河要缺知府揀員陞署以資治  
理仰祈

聖鑒事竊照蘇州府知府陳鑾陞任糧道欽奉

上諭江蘇蘇州府知府員缺緊要着該督撫於通省  
知府內揀員調補所遺員缺着恒泰補授欽此當  
經臣等查無合例堪調蘇州府之員

奏請先以淮安府知府王有慶調署再行察看酌  
辦奉

硃批知道了欽此伏查蘇州府一缺爲省會首郡管轄九縣錢漕政務殷繁時有發審案件必得勤明幹練之員方可無誤臣等與藩臬各司詳查江蘇省外知府共有六缺內鎮江府趙光祿距原籍在五百里以內例應迴避松江府蘇廷玉常州府陳肇皆甫經到任揚州府黃在厚徐州府潘樞或熟悉所屬情形本係要缺或辦理漸有成效正資整頓均未便遽行更調惟查有淮安府知府王有慶年五十七歲直隸舉人教習知縣投効軍營出力選授江蘇豐縣知縣拏獲

鄰境逆犯以知州用調補元和縣知縣嘉慶二十五年陞補泰州知州因在元和縣任內畱辦賑恤事宜出力奏奉

上諭着以同知直隸州遇缺陞用欽此陞補太倉直隸州知州復因委辦海運出力蒙

恩賞加知府銜

奏陞淮安府知府欽奉

上諭江蘇淮安府知府准其以王有慶陞署照例送部引見仍俟扣滿年限再請實授等因欽此王有慶抵任淮安以來臣等公同察看才識明敏辦

事認真人亦老練持重嗣因蘇州府要缺調補  
乏人委令先行署理該員曾任元和縣首邑於  
蘇州風土民情極爲熟悉以之調署蘇州府知  
府洵堪勝任所遺淮安府知府管轄六縣界連  
徐州海州泗州一帶民俗獷悍獄訟紛繁且濱  
臨河湖水陸交衝爲各省重空漕艘經行要區  
竝有協理河工修防事宜盜梟亦多出沒巡緝  
撫綏在在均關緊要全賴知府得人方足以資  
表率是以定爲衝繁疲難四項兼全沿河題缺  
例應在外揀員請補斷非初膺外任者所能經

理且應補遺缺知府之恒泰甫經到省察其才  
具於要缺非宜臣等再四商酌不敢稍爲遷就  
致滋貽誤自當循例另行揀補復於通省同知  
直隸州內詳加遴選江蘇直隸州三缺均甫經  
請陞非引

見未回卽尙未送部其應陞之同知或才難勝劇或  
不諳河務實無合例堪任斯缺之員惟查有海  
門廳直隸同知李國瑞年四十八歲河南舉人  
大挑知縣簽掣南河借補山陽縣裏河縣丞調  
還山陽縣知縣調補吳縣知縣因辦理賑務畱

養災民出力奉

旨以應陞之缺陞用

奏准陞補今職送部引

見仰蒙

召對該員樸實明練爲守兼優到處民情愛戴現署  
淮安府篆務經理裕如且係河工出身曾任該  
府附郭之山陽縣深知該處地方漕運河工情  
形以之陞署淮安府沿河要缺知府可收駕輕  
就熟之效該員前在秦州吳縣任內有經徵錢  
漕未完一分以上及不及一分各案處分現已

咨部照離任官例討俸議結其績報漕項全完  
之案亦經咨明漕臣照例具

題開復惟歷俸未滿年限與例稍有未符但要缺  
需員人地實在相宜例得專摺

奏請據藩臬各司會詳前來臣等往返札商意見  
相同合無仰懇

聖恩俯念省會沿河各要缺准以王有慶調署蘇州  
府知府李國瑞陞署淮安府知府實於地方漕  
運河務皆有裨益王有慶應遵前奉

諭旨照例送部引

見李國瑞前次引

見雖未滿三年仍應給咨送部引

見恭候

欽定如蒙

俞允臣等當畱心察看均照例扣滿年限再請實授

至該員等係再陞再調之員所有前任內屆限

叅罰銀兩俱照例完繳詳咨銷案所遺海門廳

直隸同知係屬要缺容另揀員請補再應補遺

缺知府之恒泰請畱於江南差委遇有相當缺

出

奏請補用合並陳明謹會同江南河道總督臣張  
井合詞恭摺具

奏伏乞

皇上聖鑒訓示謹

奏

道光九年九月初四日具

奏十一月初六日奉到

硃批另有旨欽此又同日奉到道光九年十月初六

日內閣奉

上諭蔣攸銘等奏遵員調補首府要缺竝陞署所遺

沿河知府一摺着照所請江蘇蘇州府知府准其  
以王有慶調署所遺淮安府知府員缺着以李國  
瑞陞署均照例送部引見扣滿年限再請實授其  
應補遺缺知府之恒泰着畱於江南差委遇有相  
當缺出奏請補用該部知道欽此

委藩司護篆併遞署司道摺子

奏爲暫委藩司護理撫篆及遞署司道印務仰祈  
聖鑒事竊臣於前月恭摺籲請

陛見欽奉

硃批計算程途於十一月初間抵京陛見可也欽此  
臣跪讀之下感悚難名謹遵屆期趨赴

闕廷恭請

聖訓藉伸瞻戀所有江蘇巡撫印務先經札商督臣

蔣攸銛因須前往清江浦難以兼署查蘇州藩  
司梁章鉅品正才高深知政體堪以就近護理

撫篆其藩司印務查臬司衍慶清淳練達體用  
兼優堪以署理所遺臬司印務查有江南鹽巡  
道葆謙勤慎端詳實心任事堪以委署其鹽巡  
道缺查有江寧府知府俞德淵清勤卓練堪以  
就近兼護臣仍遵奉

諭旨計算程途屆期交卸起程另行恭摺

奏報所有暫委藩司護理撫篆及遞署藩臬司道  
印務緣由謹會同大學士兩江總督臣蔣攸銛  
合詞恭摺具

奏伏乞

皇上聖鑒謹

奏

道光九年九月初四日具

奏十一月初六日奉到

硃批覽欽此

賦繁知縣四載全完請獎摺子 總督會稿

奏爲賦繁知縣徵解錢糧四載全完援案恭懇

聖恩獎勵以昭激勸事據蘇州布政使梁章鉅詳稱  
現任崇明縣知縣徐家槐前在金匱縣任內額  
徵地丁俸工扛腳等項正耗錢糧每年在五萬  
兩以上所有道光四五六七等年分均係該令  
徐家槐一手徵解四載全完併將遇災之三年  
分熟田錢糧仍於

奏銷前解足其三年分災緩錢糧亦於限內完清  
併無叅後續完之項統計前後徵完各年災熟

銀二十七萬九千二百餘兩洵屬催科得力查  
安徽省宣城縣朱錦琮經徵道光四五年錢  
糧三載全完奏奉

諭旨准其送部引見應請援案保

奏以示獎勵等情臣查定例一官經徵分數錢糧  
能每年於奏銷前全完應於照常議敘之外量  
加優敘蘇松賦繁州縣數在五萬兩以上一官  
經徵兩年於奏銷前全完准其不論俸滿卽陞  
等語又查安徽省宣城縣知縣朱錦琮徵完道  
光四五六等年地丁豆折等款共銀二十六萬

三千餘兩一手經徵三載全完經安徽撫臣奏奉

諭旨准其送部引見等因欽此今崇明縣知縣徐家槐前在金匱縣任內經徵地丁錢糧每年數在五萬兩以上該令將道光四五六七等四年地丁銀兩按年掃數全完其道光三年分係遇災之年所有熟田錢糧仍於

奏銷前解足其三年災緩錢糧亦於限內完清竝無叅後續完之項併查道光三年金匱縣被水成災該令勸令紳士捐賑計銀十萬餘兩又道

光六年收養江北災民均屬辦理妥善民情愛戴查該令經徵四五兩年錢糧兩載全完已准部議不論俸滿卽陞茲又將道光六七兩年錢糧一律徵足計係接連四載全完併查三年分災熟錢糧亦於限內全行徵解統計五年之內徵銀至二十七萬餘兩其五年中徵兌漕白糧米二十萬石有零尙不在此數洵屬催科得力查其平日地方辦事亦屬撫字有方實爲知縣中出色之員核與宣城縣知縣今陞宿州知州朱錦琮事蹟相同旣據藩司查明具詳前來自

應援案懇

恩獎勵俾各屬經徵之員知所觀感查徐家槐本係  
不論俸滿卽陞之員可否仰懇

皇上逾格鴻慈將前任金匱縣現任崇明縣知縣徐  
家槐

賞加同知直隸州知州陞銜仍照例不論俸滿卽陞  
以示鼓勵之處出自

天恩除將該員每年全完錢糧確數咨部外謹會同  
大學士兩江總督臣蔣攸銜合詞恭摺具

奏伏乞

皇上聖鑒訓示謹

奏

道光九年九月十七日具

奏十一月初九日奉到

硃批另有旨欽此又同日奉到道光九年十月十五日內閣奉

上諭陶澍奏賦繁知縣徵解錢糧四載全完援案懇恩獎勵一摺江蘇現任崇明縣知縣徐家槐前在金匱縣任內經徵地丁錢糧每年數在五萬兩以上接連四載全完併將災熟錢糧於限內全行徵

解統計五年之內完解銀至二十七萬餘兩經徵  
尙屬認真徐家槐着加恩賞加直隸州知州銜仍  
照例不論俸滿卽陞以示鼓勵該部知道欽此

籌挑徐州府屬河淤摺子總督會稿

奏爲徐州府屬河身淤墊民田常遭淹浸亟應擇  
要興挑酌議動用節省開河經費銀兩次第估  
辦以蘇民困仰祈

聖鑒事竊查徐州府所屬地土平行從前均有支河  
宣洩其在大河以南者達於洪湖大河以北者  
達於運河水脈本皆貫通嗣因歷久失修河身  
逐漸墊隘又以從前開壩沖決下游受淤每於  
夏秋大雨時行水卽漫淹田多浸沒以故民計  
日艱弱者流亡強者劫掠其命盜重案亦均由

此而起卽稍爲有力之家近因連歲失收日就空乏扼要持源實以興修水利復民業而安民生爲圖治第一急務該管徐州府知府潘標蒞任兩年以來督屬勸民多挑溝洫以資疏導然水滂之去路不通消納無幾祇可暫爲救做補偏難期一勞永逸迨至挑復手禪房亭諸河而銅山縣西北之積潦始涸修築六塘民便諸河而宿遷縣之水患方除是興舉水利之實有益於農田已有明驗必應將各屬河道擇要續挑方可漸蘇民困除銅山宿遷二縣現俱足資宣

洩外惟蕭縣之龍山河邳州睢寧縣交界之白塘河邳州之舊城民便河碭山縣之利民永定二河俱係歷年沖淤或間段阻塞或墊成平陸亟須一律挑通又沛縣之東北西三面民田悉爲山東微山昭陽二湖漫水所淹經年不涸非堅築堤工難資捍衛邳州之沂河民埝豐縣之太行堤俱各有缺口亦應修築以上數處皆係最要之工需費甚鉅若照業食佃力之例責令民間自辦則積疲之區力有未逮若借

帑徵還則累歲經年卒難歸款在民力稍裕之區

仍當勸令自行修辦惟頻歲受淹民力拮据者  
非官爲集夫挑修難以集事約計工費必須十  
餘萬兩

國家度支有常何敢以偏隅疾苦遽請動

帑而小民生計日艱又難坐視因查徐州府庫存  
貯閘河經費一款每年由兩淮運司撥發商捐  
銀一萬兩安徽藩司庫撥發間款銀一千二百  
兩共銀一萬一千二百兩爲銅山蕭縣睢寧三  
縣啟放閘壩減洩黃流挑築引河之用該三縣  
閘壩道光八九兩年堅守未放除七年以前動

用外餘存銀一萬四千兩零又運庫欠解八九  
兩年銀一萬五千兩共應存銀二萬九千兩零  
應請將府庫未用之銀作爲挑河經費以後按  
年催解擇其實在有益者分起接續辦理以守  
閘之節省爲挑河之要需洵屬以公濟公惟銅  
山蕭縣睢寧三縣閘壩若遇大河異常盛漲不  
能不爲宣洩則啟閘挑河經費亦不可無備自  
應酌留一年如九年挑河祇准動支八年及以  
前各年餘剩之項十年挑河亦祇准動支九年  
之費總以當年之項留備本工之用兩無偏廢

則徐州所屬水利得以次第興辦俾水患漸除  
元氣漸復不致蠲賑頻仍實於

國計民生兩有裨益而積困億兆災黎無不感頌  
皇仁咸登衽席矣據徐州府潘棟稟經江寧藩司賀  
長齡署徐州道余霈元核議會詳請

奏前來臣等往返札商意見相同謹合詞恭摺具  
奏伏乞

皇上聖鑒訓示謹

奏

道光九年十月初九日具

奏十一月初九日奉到

硃批另有旨欽此同日奉到道光九年十月二十二日內閣奉

上諭蔣攸銛等奏酌議興挑徐州府屬河道及動用銀兩一摺江蘇徐州府屬河身淤墊民田常遭淹漫亟應擇要興修據該督等查明蕭縣之龍山河邳州睢寧縣交界之白塘河邳州之舊城民便河碭山縣之利民永定二河又沛縣之東北西三面堤工邳州之沂河民埝豐縣之太行堤實皆最要之工議請動用節省開河經費銀兩次第估辦着

照所請將徐州府庫每年由兩淮運使及安徽藩司撥發銀款共存銀二萬九千兩零作爲挑河經費以後按年催解擇其實在有益者分起接續辦理仍酌留一年爲銅山蕭縣睢寧三縣啟開挑河之需如九年挑河祇准動用八年及以前各年餘剩之項十年挑河亦祇准動支九年之費總以當年之項留備本工之用該督等務當悉心籌畫督飭所屬妥爲經理以除水患而安民業欽此

京旋回任謝

恩摺子

奏爲恭報微臣回任接印日期敬陳感激下忱叩

謝

天恩仰祈

聖鑒事竊臣蒙

恩准令

陛見於道光九年十一月初五日趨詣

闕廷恭覲

天顏連日疊蒙

召見十二次

訓誨周詳仰邀

聖主期勉生成逾分溢量五中感激莫可名言臣於

十八日

陛辭遵卽束裝起程於十二月二十一日回抵蘇州

省城准護理撫

臣

梁章鉅將江蘇巡撫關防併

王命旗牌及文案卷宗委員賞送前來臣

卽恭設香

案望

闕叩頭祇領任事伏念巡撫責任綦重江蘇政務

尤繁臣

臣

以菲材時虞隕越茲蒙

溫諭回省任事既欣瞻就之稍抒復荷  
提撕之倍摯淪肌浹髓渥被

鴻慈

臣

敢不殫竭血誠慎終如始以承

聖訓以答

高深所有微

臣

回任接印日期及感激下忱理合繕

摺恭謝

天恩再臣經過直隸山東一帶俱屬敕靜十二月初  
七日甫抵江境適值晨雪紛敷積厚三寸有餘  
查自入冬以來雨澤稀少河道多淺得此喜雪  
深符農望各處糧價平中民情恬甯足慰

宸厯合併附陳伏乞

皇上聖鑒謹

奏

道光九年十二月二十二日具

奏十年正月二十三日奉到

硃批知道了留覽附片一件欽此

請緩

計典摺片

再本年舉行

大計例應封篆前具

題前經護撫

臣

梁章鉅奏請俟

臣

回任後再行辦

理在案茲

臣

於道光九年十二月二十一日接

印回任適屆封篆本年趕辦不及應請展限一

月俟來年開印後辦理以昭慎重謹附片陳明

伏乞

皇上聖鑒謹

奏

道光九年十二月二十二日具

奏十年正月二十三日奉到

硃批知道了欽此